

天一閣藏明代方志選刊續編



嘉靖浙江通志 下冊（浙江）

天一閣藏明代方志選刊續編
二六

上海書店

浙江通志卷四十三

人物志第六之八

呂祖謙字伯恭先河東人尚書右丞好問之孫也自其祖始居婺州祖謙舉隆興進士又中博學宏詞科累官國史編修著作郎祖謙之學本之家庭得中原文獻之傳長從林之奇汪應辰胡憲游而友張栻朱熹學以關洛爲宗少亦褊急一日誦孔子躬自厚而薄責於人之言忽覺平時渙然冰釋其所講畫將以開物成務晚雖卧疾其任重道遠之意纖悉委曲皆可爲世法卒年四十五謚成公所著見藝文志

呂祖儉字子約祖謙之弟也受業祖謙監明州倉將
上會祖謙卒部法半年不上者爲違年祖儉必欲終
暮喪朝廷從之詔違年者以一年爲限自祖儉始歷
官通判台州寧宗卽位除太府丞時韓侂冑用事正
言李沐希侂冑旨論右相趙汝愚罷之祖儉乃上封
事言甚剴切語在宋史本傳中侂冑怒安置祖儉于
韶州祖儉在謫所讀書窮理賣藥以自給每出必草
履徒步爲踰嶺之備嘗言因世變有所摧折失其素
履者皆不足言士矣因世變而意氣有所加者亦私
心也所著有大愚集

呂祖泰字泰然婺州人夷簡五世孫也性疎達尚氣
誼學問該洽徧遊江淮交當世知名士論世事無所
忌諱聞者或掩耳而走慶元初祖儉以言事安置韶
州祖泰徒步往省之且曰自吾兄之貶諸人箝口我
雖無位義必以言報國當少湏之今未敢以累吾兄
也及祖儉沒貶所嘉泰元年周必大降少保致仕祖
泰乃詣登聞鼓院上書論侂冑有無君之心請誅之
以防禍亂語甚激切在宋史本傳中詔拘管祖泰于
連州右諫議程松懼曰人知我素與祖泰遊其將謂
我預聞乎乃獨奏言祖泰有當誅之罪御史陳謙亦

以爲言乃復杖祖泰一百配欽州牢城收管發府尹
遣行尹謂之曰汝病風喪心邪祖泰曰以吾觀之今
之附韓氏得美官而負朝廷者乃病風喪心耳祖泰
詣貶道出潭州錢文子爲醴陵令素與祖泰無交乃
私贐其行侂冑使人迹之祖泰乃匿襄郢間後侂冑
誅朝廷詔雪其冤而祖泰卒

陳埴字器之永嘉人少穎悟父從朱熹于武夷所見
超卓紹定間江淮制置趙善湘建明道書院辟埴幹
辦公事兼主講席四方學者從游數百人稱爲潛室
先生埴舉進士以通直郎致仕所著有禹貢辯洪範

鮮王制章句木鍾集

曹叔達瑞安人少學于陳傅良紹熙初登進士累官
禮部侍郎隨事獻替多所裨益嘗編永嘉譜人謂其
有史才

陳傅良字君舉瑞安人初患科舉程文之弊爲文章
自成一家人爭傳之從者雲合文擅當世是時永嘉
鄭伯熊薛季宣皆以學行聞而伯熊於古人經制治
法討論尤精傅良皆師事之而得季宣之學爲多及
入太學與張栻呂祖謙友善而主敬集義之功得於
栻爲多旣登進士爲泰州教授叅知政事龔茂良薦

于朝改太學錄出判福州梁克家領帥事委成于傅
良傳良平一府曲直以義斷決強禦者不得售其私
陰囑言官論罷之學者稱爲止齋先生其平生所著
見藝文志

湯建字達可樂清人建於天文地理古今制度考覈
精詳遂棄舉子業以其學校徒學者稱爲藝堂先生
每夙興必讀易一卦退與友朋商論欣欣自得年踰
八十卒有詩衍義論語道德經解

樓昉鄞縣人舉紹熙進士昉與弟晒俱以文名少從
呂祖謙學其文汪洋浩博學徒凡數百人嘗集古今

文名曰崇古文訣

周行已字恭叔永嘉人以文行著入太學作齋揖文
同舍遵行之時豐稷爲司業騶從誼開行已移書規
切稷愧謝由是名重京師時尚新學行已獨之伊洛
從二程子游作顏子不二過論有曰過不必大毫末
萌於心而天地爲之應悟不必久斯湏著於心而天
下歸其仁伊川曰是子達早登元祐進士除太學博
士行已請于朝願分教鄉里以便養親詔許之於是
以所聞於程氏者發明旨要以迪後進父沒服除授
齊州教授御史毛注劾行已師事程願卑汚苟賤無

所不至遂罷歸然永嘉知有伊洛之學寔自行已始
陳亮字同父永康人生而才氣超邁所交盡一時豪
俊潛心於中庸大學以精性命之理隆興初與金人
約和天下忻然幸得蘇息獨亮持不可因上中興五
論奏入不報已而退脩于家力學著書者十年淳熙
中詣闕上書極言時事壽皇欲官之亮曰吾欲爲社
稷開數百年之基寧用以博一官乎乃歸與邑之狂
士飲醉中戲爲大言言涉犯上忌者欲中亮以其言
告刑部何澹以狀詞下大理笞掠亮無完膚誣爲不
軌孝宗曰秀才醉後妄言何罪之有亮遂得免未幾

亮家僮殺人于境屬臺官論亮下大理丞相王淮知
帝欲生亮而辛棄疾羅點援之尤力復得不死亮以
屢遭大獄歸家益厲志讀書其學自孟子後唯推王
通嘗上書孝宗其畧曰今世儒自謂得正心誠意之
學者皆風痺不知痛癢之人也舉一世安於君父之
大讐而方且揚眉拱手以談性命不知何者謂之性
命乎蓋指其友人朱熹呂祖謙輩也光宗時舉進士
第一授僉書建府判官未至官一夕卒亮志存經濟
人人見其肺肝雖爲布衣時薦士唯恐弗及朝廷惜
其不獲大用官其一子

喻偁字伯經義烏人慶元間舉進士歷慶元府觀察
推官改奉議郎僉書鎮南軍節度判官尋陞朝奉郎
初偁久從諸縉紳游幕中多新進少年議論多不合
偁嘆曰吾髮已種種寧能與翩翩小兒較短長哉遂
請祠而歸築室隱于夫人峯下自分終身偁性豪談
論今古輒目光如注氣軒軒出鼻吻間人莫能抗尤
長於文辭當乾道淳熙間朱熹呂祖謙陸九淵張栻
皆談性命而關功利學者各驚其師說截然不可犯
陳亮偁起其中獨以爲不然且謂性命之微子貢不
得而聞吾夫子之所罕言後生小子與之談之不置

其皆可與語上者哉禹無功何以成六府乾無利無以具四德如之何其可廢也於是推尋孔孟之志六經之旨諸子百家分析聚散之故然後知聖賢經理世故與三才並立而不廢者皆明白簡易人多疑其說而未信侃獨出爲諸生倡扶持而左右之使亮之門惡聲不入于耳而高名頓出世儒之上皆侃之功也已而亮不爲世俗所容當路必欲擠之死地凡再下詔獄侃與同志之士極力營解幾陷羅織遂脫亮於萬死一生之中人多義之侃所著有隨類錄二百卷蘆隱類藁五十卷首論六經之功用云

喻南強字伯強義烏人侃之從弟也自幼負奇氣父直方以南強與陳亮類俾從之游慶元間貢于鄉入太學上禮部不第嘉定間授富陽縣尉寶慶初禮部侍郎真德秀以言事去廟堂諷京尹跡其所至欲并以爲罪德秀舟過富春江南強亟見且賦詩爲餞人皆壯之南強讀書不爲口耳學必欲見之實踐每至名義可喜事擊節慷慨初當路欲排善類指陳亮爲根燬煉刺骨罪且不測門人畏其威焰噤不敢出一語南強義形辭色貽書誚責同門謂陳先生無辜受罪將齎恨入土吾曹爲弟子當怒髮衝冠乃影響昧

時是得爲人類邪復走東甌見葉適備陳寃狀適曰
子真義士也卽秉燭爲作書數通南強持之走越袖
見諸臺官訟言無忌竟直亮之寃南強爲人不立崖
岸而見義勇爲聞朝廷行一善政輒昂首吐氣或有
司苛虐則彈指長吁終日不樂暇時旅肴設醴與賓
友握手劇談不倦爲文下筆輒數千言不繩削而自
合矩度大篇短章憑人取去往往不甚愛惜惟梅隱
筆談十四卷尚存宋史氏贊曰自道廢民散弟子之
義缺平居則繆爲恭敬一逢患難輒反目若不相識
甚者至欲更名辟去雖以唐房杜之徒因其師王通

與長孫無忌有隙遂不一言及通至使後人謂通中說借唐初名臣以自重嗚呼通何人哉何有于房杜諸人也向使偶與南強見之必將唾叱之矣傳曰民生於三事之如一唯其所在則致死焉其偶與南強之謂乎

洪璞字叔玉睦州人仕爲鎮東節度推官陳備邊八策遷邵武通判楊簡薦之朝曰璞守官數十年而無屋可居無田可養節操方正可備獻納科未報而卒所著有省堂文集

葉時仁和人操履端凝累官至龍圖閣學士卒謚文

康所著有禮經會元竹野集

石密新昌人與朱熹爲友所著有大學中庸輯畧行于世

詹儀之字體仁遂安人銳于問學舉紹興二十一年進士淳熙二年知信州時朱熹呂祖謙在鵝湖論學儀之往復問辨無虛日後帥廣東論廣鹽官鬻之弊孝宗避之除吏部侍郎知靜江府在任六年官鬻弊革未幾代者中以飛語遂謫袁州公論惜之

詹至字及夫遂安人父安爲鄉先生躬教四子皆舉進士至其次也建炎初通判鞏州虜騎將及境郡守